

- 213 Staðfesting konungs á skipulagsskrá fyrir „Fræðslusjóð Aðaldælahrepps“ út-
27. nóv. gefin á venjulegan hátt að mandatum af dóms- og kirkjumálaráðherra 27. nóvember 1939.

Skipulagsskráin er þannig:

SKIPULAGSSKRÁ

fyrir Fræðslusjóð Aðaldælahrepps.

1. gr.

Sjóðurinn heitir: Fræðslusjóður Aðaldælahrepps. Stofnféð er 600 krónur, og hafa þessir lagt það fram: Búnaðarfélag Aðaldæla, U.m.f. Geisli, Kvenfélag Aðaldæla, Jóhannes Friðlaugsson, Hugi Jóhannesson, Snær Jóhannesson, Völundur Jóhannesson, Hringur Jóhannesson, Heiður Jóhannesdóttir, Pétur Sigurðsson, Steingrímur Baldvinsson, Þorgeir Jakobsson, Jón Bjarnason og ónefndur.

2. gr.

Sjóðinn má auka með gjöfum og áheitum. Auk þess er stjórn sjóðsins heimilt að hafa til sölu minningarspjöld og rennur þá allur ágóði af sölu þeirra í sjóðinn.

3. gr.

Takmark sjóðsins er að styrkja fátæka unglinga í Aðaldælahreppi til framhaldsnáms í æðri skólum, bæði samskólum og sérskólum. Skulu þeir unglingar sitja fyrir styrk, sem skarað hafa fram úr um áhuga og hæfileika til náms í barnaskóla Aðaldælahrepps. Umsóknum skal fylgja vottorð og meðmæli kennara barnaskólans og prófdómara og formanns skólanefndar. Auk þess má veita efnilegu, ungu fólki úr Aðaldælahreppi styrk úr sjóðnum til framhaldsnáms erlendis í einhverri sérgrein, eða til þess að afla sér þar fræðslu, sem að gagni getur komið fyrir æfistarf þeirra.

4. gr.

Þegar vextir af sjóðnum eru orðnir 300 krónur á ári, má veita $\frac{2}{3}$ af þeim í styrki, en $\frac{1}{3}$ leggist við höfuðstólinn. Þegar vextirnir nema 500 kr. má veita $\frac{4}{5}$ af þeim í styrk en $\frac{1}{5}$ leggist við höfuðstólinn. Þegar vextirnir nema 1000 kr. má verja $\frac{9}{10}$ þeirra í styrki, en $\frac{1}{10}$ leggist við höfuðstólinn. Þegar vextirnir eru orðnir 1500 kr. má verja þeim öllum í styrki.

5. gr.

Stjórn sjóðsins skipa 3 menn: formaður og 2 meðstjórnendur. Stjórnin skiptir sjálf með sér verkum. Kosning hennar fer þannig fram: Búnaðarfélag Aðaldæla velur 1 menn í stjórnina, U.m.f. Geisli annan og Kvenfélag Aðaldæla hinn þriðja. Stjórnin er kosin til 5 ára og fer kosning fram þegar ártal stendur á hálfum og heilum tug, í fyrsta sinn árið 1935. Hætti eitthvert af þessum félögum störfum, kys almennur sveitarfundur mann í stjórnina í stað þess.

6. gr.

Stjórnin sér um að fé sjóðsins ávaxtist á tryggum stað eða stöðum, hún auglýsir þegar styrkveitingar hefjast úr sjóðnum, tekur á móti umsóknum, veitir styrki og fer með önnur þau mál, er sjóðinn varða.

7. gr.

Reikningsár sjóðsins er almanaksárið.

8. gr.

213

Reikningur sjóðsins skal endurskoðaður ef endurskoðanda sveitarreikninga Aðaldælahrepps og sendur ásamt þeim til sýslunefndar Suður-Þingeyjarsýslu til yfirskoðunar.

9. gr.

Skipulagsskrá þessari má ekki breyta, nema stjórn sjóðsins leggi það til og $\frac{1}{2}$ af kjósendum í Aðaldælahreppi samþykki breytinguna á fundi. Þó má aldrei skerða höfuðstólinn, né heldur breyta því aðal-markmiði sjóðsins að efla menningu íbúa Aðaldælahrepps.

10. gr.

Leita skal konungsstaðfestingar á skipulagsskrá þessari og óskast hún birt í B-deild Stjórnartíðindanna.

REGLUGERÐ

214

9/8 '38

um styrk til að endurreisa íbúðarhús í sveitum.

Samkvæmt III. kafla laga nr. 76 11. júní 1938, um byggingar- og landnámssjóð, eru sett eftirfarandi ákvæði:

1. gr.

Ríkissjóður leggur árlega fram 125 þúsund krónur til að styrkja endurbyggingar eða endurbætur íbúðarhúsa á jörðum í sveit. Styrkurinn sé veittur sem óafturkræft framlag.

2. gr.

Styrk þenna má veita eftir þeim reglum og með þeim skilyrðum, er hér segir:

1. Að umsækjandi sé islenskur ríkisborgari og fullveðja.
2. Að hann sanni með síðustu skattskýrslu sinni, staðfestri af skattanefnd, að hann eigi svo mikil efni sem nauðsynleg eru til búrekstrar á jörðinni, en geti ekki af eigin rammleik reist íbúðarhús á henni.
3. Að hann sanni með vottorði hreppstjóra, að jörðin liggi ekki undir skemmdum af völdum náttúrunnar.
4. Að húsin séu gerð úr varanlegu efni og gerð þeirra utan og innan samþykkt af nýbýlastjórn.
5. Að sveitarstjórn telji jörðina svo vel í sveit setta, að ráðlegt sé að endurreisa bæjarhús á henni.
6. Að lögð sé fram stutt lýsing á bæjarhúsum umsækjanda, undirrituð af virðingamönnum Brunabótafélags Íslands.
7. Að fyrir liggi frá trúnaðarmanni Búnaðarfélags Íslands, eða trúnaðarmanni nýbýlastjórnar, ef ekki næst til trúnaðarmanns Búnaðarfélags Íslands, yfirlýsing um, að húsið verði, ef um endurbyggingu er að ræða, reist á hentugum stað, miðað við ræktun, vatnsból, síma, vegi o. s. frv.
8. Að sannað sé með vottorði hreppstjóra og héraðslæknis, að húsakynninn séu óhæf til íbúðar.
9. Að jörðin sé í sjálfsábúð eða falli undir ákvæði laga um erfðaábúð og óðalsrétt.
10. Að fasteignamat (millimat) bæjarhúsa sé ekki yfir 1800 krónur, ef jörðin er í sjálfsábúð.
11. Að landverð jarðar í opinberri eign fari ekki yfir 8000 kr.
12. Framlag til hvers einstaks býlis má vera 500—1500 krónur, þó aldrei meira en $\frac{1}{3}$ af kostnaðarverði hússins. Til íbúðarhússbygginga, þar sem um lán og styrk er að ræða, má láns- og styrksupphæðin samtals ekki fara yfir 6000 krónur til hvers býlis.